

**Uunga siunnersuut: Kalaallit Nunaannut suliffissarsiortut killilersimaarnissaat pillugu  
Inatsisartut inatsisaata allanngortinneqarnera pillugu Inatsisartut inatsisaat nr. xx, xx.  
xxx 2017-imeersoq**

(Inuussutissarsiornermut, Suliffeqarnermut, Niuernermut Nukissiuuteqarnermullu  
Naalakkersuisoq)

**pillugu  
siunnersuutip aappassaaneerneqarneranut**

**Inuussutissarsiornermut Aatsitassanullu Ataatsimiititaliap**

**ISUMALIUTISSIISUTAA**

Ataatsimiititaliap suliarinninnermini kingullermik ilaasortarai:  
Inatsisartunut ilaasortaq Peter Olsen, Inuit Ataqtigiit, siulittaasoq  
Inatsisartunut ilaasortaq Justus Hansen Demokraatit, siulittaasup tullia  
Inatsisartunut ilaasortaq Nikkulaat Jeremiassen, Siumut  
Inatsisartunut ilaasortaq Jens-Erik Kirkegaard, Siumut  
Inatsisartunut ilaasortaq Knud Kristiansen Siumut  
Inatsisartunut ilaasortaq Kelly Berthelsen, Inuit Ataqtigiit  
Inatsisartunut ilaasortaq Per Rosing-Petersen, Partii Naleraq

**1. Siunnersuutip imarisai siunertaalu**

Siunnersuutip § 6, imm. 3 allanngortippaa, taamaalilluni qinnuteqaatip tunniunnerata kingorna ullut 14-it kingornatigut aalajangiisoqarsimangippat avataanit sulisartunik atorfinitsitsinissamut akuersissut aalajangiunneqareersutut isigineqartarunnaassalluni. Paarlattuanik qinnuteqaatip tiguenerata kingornatigut ullut 14-it qaangiutsinnagit kommunalbestyrelsi aalajangiissaaq, paasissutissanik annertunerusunik takussutissanilluunniit uppersaataasunik aalajangiinissamut pisariaqartinneqartunik kommunalbestyrelsi piunasaqarsimangippat.

## **2. Siunnersuutip Inatsisartunit siullermeerneqarnera**

Oqaaseqartartut oqaaseqaataat siullermeerinninnermilu oqaatigineqartut tunngavigalugit Inuussutissarsiornermut Ataatsimiititaliamit oqaatigineqassaaq siunnersuut oqaaseqartartunit amerlanerussuteqartunit taperserneqarmat. Inatsisartunit naalakkersuinikkut oqariartuut taanna Inuussutissarsiornermit tusaatissatut tiguneqarpoq.

## **3. Tusarniaanermut akissutit**

Siunnersuut piffissami 12. april 2017-imit 10. maj 2017-imut tusarniaassutaasimavoq makkununga:

Sulisitsisut (Grønlands Erhverv (GE)), NUSUKA, SIK, KANUKOKA, Kommuneqarfik Sermersooq, Qaasuitsup Kommunia, Qeqqata Kommunia, Kommune Kujalleq aamma namminersorlutik oqartussani naalakkersuisoqarfiit tamarmik.

Piffissamissaaq tassani siunnersuut namminersorlutik oqartussat tusarniaanernut nittartagaanut inissineqarsimavoq.

Tusarniaanermut akissutit ukuninnga tiguneqarput: SIK, GE, Kommuneqarfik Sermersooq, KANUKOKA, Pinngortitamut Avatangiisinullu Naalakkersuisoqarfik, Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfik, Aatsitassanut Ikummatissanullu Naalakkersuisoqarfik, kiisalu Aningaasaqarnermut Akileraartarnermullu Naalakkersuisoqarfik.

Siunnersuutip annertunnginnera eqqarsaatigalugu Inuussutissarsiornermut Aatsitassanullu Ataatsimiititaliaq isumaqarpoq piffissaq tusarniaaffiusoq naammaginarpoq tusarniaanerullu sivilissusianut oqaaseqaatissaqarani. Ataatsimiititaliartaaq isumaqarpoq tusarniarneqartut oqaaseqaataat Naalakkersuisunit naammaginarpoq annertussusilimmik ilanngunneqarlutillu issuaavigineqarsimasut. Taamatuttaaq tusarniarneqartunit oqaaseqaatigineqartunut ernummatigineqartunullu tunngatillugu allannguutissatut siunnersuutip imarisai siunertaalu siunnersuummut nalinginnaasumik nassuiaatini Naalakkersuisunit itisilerneqarlutillu nassuiaatigineqarput. Taamaattumillu tusarniaanerup ingerlanneqarneranut ataatsimiititaliaq allanik oqaaseqaatissaqarani.



#### 4. **Ataatsimiititaliap siunnersuummik suliarinninnera**

Inatsisartut ukioq 2016 upernaakkut ataatsimiinneranni Kalaallit Nunaannut suliffissarsiortut killilersimaarnissaat siunertaralugu Inatsisartut aalajangiiffigisassaattut siunnersuut UPA2016/85, Kalaallit Nunaani atorfinitsitsisarneq pillugu Inatsisartut inatsisaanni § 6 imm. 3-p naleqqussarneqarnissaanik Naalakkersuisut kingusinnerpaamik UPA2017-mi allannguutissamik suliaqqullugit peqquneqarnissaat Inatsisartunit akuersissutigineqarpoq. Aalajangiineq tamanna tunngavigalugu Inatsisissatut siunnersuut manna saqqummiunneqarpoq. Inatsisissatut siunnersuut paragrafimik ataatsimik imaqarmat takisuuliunnginnissaq Ataatsimiititaliaq isumaqarpoq. Ataatsimiititaliamit tassunga atatillugu UKA16/85-imut isumaliutissiissusiornermi suliaqarnermini inatsisissatullu matuminnga suliarineqarnermi sukumiisumik suliarineqarsimanera innersuussutigineqassaaq. Naggataatigullu inatsisissatut siunnersuummut atatillugu Ataatsimiititaliamit tunngaviummik isummersornissamut oqaaseqaatinik ilangussinissaq isumaliutigineqarnissaa innersuussutigineqassaaq. Kommunit ingerlatsineranni inatsisip allaffissornikkut, minnerunngitsumillu inuussutissarsiortunik eqaatsumik pitsaassutsimillu qaffasissumik sullissiniarnermi allaffissornikkut artukkeeratarsinnaanera Naalakkersuisunit malinnaavigineqassasoq Ataatsimiititaliap naatsorsuutigaa. Inatsit siunertaq uniorlugu sunniuteqassagaluarpat Ataatsimiititaliap naatsorsuutigaa Naalakkersuisut aaqqiissutissanik suliaqassasut.

#### 5. **Siunnersuutip aningaasaqarnikkut kingunerisassai**

Siunnersuutip aningaasaqarnikkut allaffissornikkullu kingunerisassai siunnersuummut nalinginnaasumik nassuiaatini Naalakkersuisunit nassuiaatigineqarput. Tamatuma annertunerusumik oqaaseqarfiginissaa ataatsimiititaliamit pisariaqartinneqanngilaq.

#### 6. **Ataatsimiititaliap inassuteqaatai**


Amerlanerussuteqartut Inuit Ataqtigiit, Siumup aammalu Partii Naleqqap ilaasortaataasa siunnersuut akuerineqassasoq inassutigaat.

Ikinnerussuteqartup Demokraatit ilaasortaataata ataani allassimasunik oqaaseqaateqarluni siunnersuut itigartinneqassasoq inassutigaa.

“Demokraatit pingaartitaraat maani nunami inuussutissarsiornermi atugassarititaasut ingerlassappata pitsaanerpaamik inissisimanissaat. Suliffeqarfik ajunnginnerpaamik avaqqunneqarsinnaanngilaq sulisinnaassuseq pisariaqartinneqartoq pissarsiarisinnaagaa siunertamut ingerlanissaminut aqqutissiuussisinnaasumut. Isumaqarpugut pingaaruteqarluinnartoq suliffeqarfik sulisussarsiornermi nunatta sulisinnaasuunik

ujarlissasoq suliffissaaleqineq maannakkut appariartortoq takusarput annikillisaataaffiginiarlugu. Kisiannili suliffeqarfik pisariaqartitai puigussanngilagut. Suliffeqarfinnut aporfussanngilaq kommunini sulilersitsinissamut akuersissutit avataaniillu tikisitanut tunngasunik sulianik aalajangiisarneq kigaatsumik ingerlanneqarneri pissutigalugu. Tamanna pineqartillugu isumaqarpugut aaqqissuussineq, amigartumik naliliisarneq isumaqartoq suliffeqarfik akuersissummik pisinnaasoq pissusissamisoortoq. Pisortaqarfinniit kigaatsumik ingerlatseriaaseqarneq namminersorlutik suliffeqarfiutilinnut eqquinerlussanngilaq taakuummatami nunatsinni suliffissanik inuussutissarsiornermillu siuarsaasut.” Taamatut oqaaseqarnerput aalajangiusimavarput aamma taamaattumik inassutigaarput siunnersuut itigartinneqassasoq.

Taama oqaaseqarluni isumaliutissiissummilu allassimasutut paasinnilluni ataatsimiititaliap siunnersuut aappassaaniigassanngortippaa.



Peter Olsen,  
Siulittaasoq



Justus Hansen



Nikkulaat Jeremiassen



Jens-Erik Kirkegaard



Knud Kristiansen



Kelly Berthelsen



Per Rosing-Petersen